



Senter for internasjonalisering av utdanning
Postboks 1093
5809 BERGEN

Dato: 01.07.2014
Vår ref.: 2014/16323-2
Saksbehandlar: berroks
Dykkar ref.:

Søknad om godkjenning av praksisopphald i Tanzania med støtte frå Lånekassen

Hordaland fylkeskommune (HFK) ønskjer å endre tilbodet om praksisopphald på Zanzibar i Tanzania for elevar som tek Vg2 helsearbeidarfag og barne- og ungdomsarbeidarfag ved Lønborg videregående skole. Dette samarbeidsprosjektet blei godkjent for utdanningsstøtte av Kunnskapsdepartementet i brev av 24. september 2010 og i brev av 8. januar 2013. HFK ønskjer framleis å utplassere elevar og lærlingar i Tanzania, men frå skuleåret 2014 – 15 vil tilbodet til elevane og lærlingane vere på fastlandet. HFK søker med dette om godkjenning av endring av tilbodet og har tiltru til at det er mogleg å endre praksisplass når alternativ plassering er i same land som det er gitt godkjenning for tidlegare.

Bakgrunn

Fylkesutvalet i HFK vedtok i mai 2010 at Lønborg videregående skole kunne opprette ei internasjonal linje i helsearbeidarfaget der inntil 15 elevar/lærlingar på Vg2 skulle få delar av opplæringa si på ulike helse- og sosialinstitusjonar på Zanzibar. I 2013 blei ordninga utvida til også å omfatte elevar og lærlingar frå barne- og ungdomsarbeidarfaget. Bakgrunnen for prosjektet var eit ønske om å gjere helsefagarbeidarutdanninga meir attraktiv og såleis rekruttere fleire ungdommar til utdanninga. Både helse- og oppvekstsektoren har utfordringar med å skaffe tilstrekkeleg personell og nødvendig fagkompetanse, og eit slikt tilbod ville kunne gi fleire og betre kvalifiserte og motiverte helsefagarbeidarar og barne- og ungdomsarbeidarar og på sikt auke kvaliteten på helse-, omsorg- og oppveksttenestene. Prosjektet har vore vellukka både i høve til rekruttering og læringsutbytte, og dei 40 elevane og lærlingane som har hatt praksisopphald på helseinstitusjonar og barneheim på Zanzibar har alle gjeve positive tilbakemeldingar etter opphaldet.

På grunn av stigande uro på Zanzibar valde HFK ikkje å sende elevar og lærlingar til øya i skuleåret 2013 - 2014. Utanriksdepartementet åtvarar ikkje direkte mot å opphalde seg på Zanzibar, men dei meiner at den politiske uroa vil stige fram mot valet i 2015. Kriminalitet retta mot turistar ser ut til å auke, men den politisk motiverte valden har så langt ikkje retta seg mot utlendingar. HFK har etter fleire møte og ei grundig vurdering vedteke at ein ikkje lenger vil tilby praksisopphald på institusjonar på Zanzibar, men heller ønskjer å etablere eit samarbeid med Tanga International Competence Center Ltd (TICC) på fastlandet i Tanzania. Tilbodet vil vere det same som det var på Zanzibar; alle elevar i Hordaland som har fullført Vg1 helse- og oppvekstfag, kan søkje på Vg2 helsearbeidarfag eller barne- og ungdomsarbeidarfag ved Lønborg vgs. I løpet av Vg2 vil opp til 15 elevar få delar av opplæringa (delar av prosjekt til fordjuping) på fleire helse- og omsorgsinstitusjonar i Tanga. Lærlingar kan søkje læreverksemda om å få ta del i prosjektet. Opphaldet på åtte veker vil dekke både programfag og fellesfag for elevane, samt oppfølging av kompetansemål for lærlingane. Sidan elevane, lærlingane og lærarane vil bu på området til kompetansesenteret, vurderer fylkeskommunen dette opplegget som tryggare enn tilbodet på Zanzibar.

Samarbeidsprosjekt med kompetansesenteret TICC

I samband med vurderinga av ei reetablering av tilbodet på Zanzibar for skuleåret 2014 – 2015 valde rektor ved Lønborg vgs å besøke TICC-Tanga for å sjå på moglegheitene for eit samarbeid på fastlandet i Tanzania. Kompetansesenteret som starta i 2006, er leia av norske Ruth Nesje. Målet for senteret er å bli eit leiande kompetansesenter i Aust-Afrika, og det er i dag leiande i Tanzania. Frå 2008 har norske sjukepleiarstudentar hatt høve til å gjennomføre praksis gjennom TICC. Senteret har samarbeid med åtte høgskular i Norge og tre i Tanzania. TICC tilbyr fagleg opplegg for studentar og vil også kunne tilby Lønborg vgs same opplegg, men tilpassa til fagplanar i helsearbeidarfaget og barne- og ungdomsarbeidarfaget. Hovudfokus for senteret si satsing har vore helsesektoren, men er no i utvikling mot også samfunnsgeografi, barneomsorg, sosialt arbeid, fredsarbeid, utviklingsstudiar og ernæringsfag. Innan helsefag er det utvikling mot folkehelse, jordmor, medisin og psykiatri.

Det vil under heile praksisopphaldet på åtte veker vere minimum to lærarar saman med elevane, og desse vil ha det faglege ansvaret. I faget Prosjekt til fordjuping i Norge blir elevane følgd opp av den einskilde verksemda. Slik vil det naturleg nok ikkje vere i Tanga. Det er derfor viktig at det er faglærarar til stades under heile praksisopphaldet for å følgje opp elevane sin læringsprosess. Elevane vil bli utplassert i institusjonar og heimar. Det vil bli lagt til rette for oppgåver både på sjukehus og i eldreheimar samt praksis i barnehage, på familieheimar og Day Care for handikappa barn. Elevane vil få undervisning av lærarar frå Lønborg vgs i dei læringsmåla som er sett opp på undervisningsplanen heime, men tilpassa føresetnadene i Tanga. Det faglege utbyttet eit opphald på Tanga kan gje, er naturleg nok annleis enn å vere i Norge. Det vil krevje meir av kvar elev. Dei må vise at dei er sjølvstendige og løysningsorienterte på ein heilt annan måte enn heime. Erfaringane frå Zanzibar viser at elevane og lærlingane gjorde ein framifrå innsats ved dei institusjonane dei var utplasserte, og dei var reflekterte og modne i læringsprosessen.

Svein Heggheim
fylkesdirektør opplæring

Berit Roksvåg
seniorrådgjevar

Brevet er godkjent elektronisk og har derfor inga underskrift.

Vedlegg

- 1 Zanzibar - Godkjenning 2010
- 2 Zanzibar - Godkjenning 2013